



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

21. Kalenderwoche – ab 21. Mai 2011

Glabborn geheerd nisch zum Audo!

Isch weeiß schon gahr nisch mähr, seid wie lange das bei mir geglabbord had! Also, nisch bei mir in dor Riebe! Nee, da dud nischd glabborn, da dun sisch de Rädln drehn wie geeld!

Abor in meim Audo had was geglabbord. Seid währ weeiß wie lange schon! Un das Glabborn, das dad so aus dähr Geeschend komm, wo de nisch rankomm dusd. Das Glabborn, das had so unnorm Amaduhrenbredd gesessn - un had sisch wahrscheinlich heimlich ins Feidschn gelachd, weil ischs nisch gefundn hab. Ewisch nisch!

Ja, es is e ziehmlich hindorlisdisches Glabborn gewähsn. Mid eim sähr schleschdn Garagdor!

Es is nähmlich ooch nisch immor dagewähsn, das Glabborn. Es is immor erschd während dor Fahrd, bei ganz beschimnde Geschwindischkeedn hervogedrähnd. Manschma hab isch schon gedachd, es is weg - abor da kams dann widdor! Am liebsdn hädsch die Karre vorschroddn lassn.

E Audo mid Glabborn unnorm Amaduhrenbredd, das is doch kee Audo, das is eene Närvsäsche!

Was gloom Sie, wie ofd isch vorsuchd hab, vom Modorraum hähr rauszugrischn, was da während dor Fahrd anfang dud zu glabborn. Abor wensde ehm schdehn dusd, glabbord nischd. Un wensde fahrn dusd, kannsde nisch in dähn Modorraum neinguggn. Du heersd es ehm bloß. Un du weeiß nisch genau, von wos komm dud. Meine Gudste meende immor, es dud mähr von vorne links komm. Isch habs immor mähr von reschds geheerd.

Friehor, wo mor noch unsorn Trabi haddn, dähn hasde dann eenfach in alle Deelee zorleeeschd un widdor zusammgebaud, wenn da ma was geglabbord had. Hinnorhähr is das Glabborn weg gewähsn. Jednfalls an dähr Schdelle, wos gewähsn is. Dasses dann widdor an eenor annorn Schdelle geglabbord had, das had eim nährlich nisch so sähr midgenomm - das geheerde ja zu eim Trabi irschendwie dazu. E Trabi, dähr nisch glabborn dad, war kee Trabi!

Abor wenn heidzudaache so e Audo - vollgeschdobbd mid Heidegg un Elegdronig! - wenn das irschendwo glabborn dud, wie e Trabi... nee, das hälsde im Kobb nisch aus. Da kannsde als Audofreind dran vorzweifln!

Isch hab vorsuchd, ieborn Lifdungskanal so lange Schdreefn Schaumschdoff unnorsch Amaduhrenbredd neinzuschdobbn... isch hab Lagg neingeschbriehd mid dor Schbriehflasche - na, isch dachde, dähr Lagg dud villeischd das Glabborn dursch Vorglähbung vorhindorn... - das Glabborn hadde de bessren Närvn! Es kam immor widdor! Bis nu jedzde... ährlisch, e Meesdor aus dor Wergschdadd had das Glabborn besieschd! Ohne Misd! Obwohl isch schon bei viele Durschsischdn immor widdor das Glabborn angemängld hadde... - nu wars werglich weg! Also, jednfalls seid drei Daachn. Odor duds bloß schlafn?

Isch schdeische jedzde jednfalls immor ganz vorsischdisch ein un du de Diern nisch so zublaudzn. Nisch, dass das Glabborn widdor offwachn dud!

Eduard Sachsenmeyer